

### Unha administración local equitativa, áxil e solidaria

- Asegurar un trato sen privilexios e igualitario para todas as persoas, abrir vías de diálogo e consenso e propiciar unha xestión transparente desterrando a prepotencia e o autoritarismo. A TV-local volverá aos Plenos.
- Configurar unha administración achegada ao cidadán, dinámica, flexíbel, accesíbel e que ofrezca servizos de calidade. Con este fin, elaborárase un plano marco que defina as liñas estratéxicas, obxectivos e medidas para optimizar os niveis de prestación de servizos.



- Estabelecer oficinas municipais de Atención á cidadanía nos Tilos e na zona de Calo, co obxectivo de facilitar labores de información ou de recollida de documentación.

### Participación social

- Promover a participación social na vida municipal. Volver a poñer en marcha o *Regulamento de Participación Veciñal* que o BNG presentara na pasada lexislatura e que, na súa curta vixencia, permitiu que, por primeira vez, os veciños/as de Teo interviran nun Pleno en defensa dos intereses de colectividade afectadas.
- Posta en marcha, de forma progresiva, duns orzamentos municipais participativos, de xeito que a cidadanía asuma responsabilidades na toma de decisións que afectan ao seu meio físico e humano.

### Urbanismo

- Garantir un proceso transparente e participativo na elaboración do PXOM.
- Defender que o futuro PXOM estableza un modelo de ordenación que garanta un desenvolvemento amplo dos núcleos rurais coa dotación de servizos necesaria, promovendo un medre harmónico e equilibrado, ao tempo que compense a carencia de zonas verdes e usos públicos que o urbanismo salvaxe dos últimos anos produciu.



- Propoñémonos impedir que os novos viais esnaquicen os núcleos tradicionais de poboación.
- Defender, dende a administración local, a modificación da nova Lei do Solo de Galicia, e impedir que o Concello utilice o sistema de "concesión de obra urbanizadora" que permite a nova Lei.
- Proceder á contratación dun Arquitecto Municipal.

### Vivenda

- Incrementará-se a construción de vivendas de protección oficial de promoción pública e criarás-se unha dotación de vivendas sociais que poidan ser ofertadas en aluguer a persoas que polas súas necesidades específicas precisen, durante un período determinado, dispoñer duna vivenda digna sen ter que recorrer á súa compra.



### Infraestruturas e seguridade vial

- Elaboración dun Plano Cuatrienal de Infraestruturas (estradas, pistas, sinalamentos,...), que defina as prioridades e os investimentos en obras e infraestruturas a medio e longo prazo, ao tempo que se activa un plano urxente de acondicionamento das principais estradas e pistas.
- Articularanse medidas para evitar que se circule a velocidades perigosas nas vías interiores do concello, especialmente nas proximidades dos núcleos.



- Pintado de carrís de incorporación á C-541 e colocación de semáforos para o paso de peóns no tramo Cacheiras-Montouto, facilitando así tamén a incorporación de vehículos dende as estradas laterais.



- Negociar coas autoridades competentes unha solución definitiva ao *punto negro* da N-550 no tramo das Galanas e o redimensionamento das minirrotondas da Casalonga, fontes de contínuos percances polas súas escasas dimensións.
- Xestionar unha solución definitiva á saída dos Tilos cara a C-541 e impedir que as principais vías desta urbanización se convertan en travesías de alta velocidade.

### Saneamento e abastecemento de auga

- É obxectivo prioritario do BNG completar a rede de saneamento e de abastecemento de auga. Neste sentido, negociarase coa Consellería o redimensionamento da rede de depuradoras, na actualidade moi deficiente, xa que concello só conta con tres depuradoras de tratamento biolóxico (Os Tilos, Os Verxeis e a de Francos).
- Tomaranse medidas para solucionar con urxencia os graves problemas que provoca a conexión aos sumidoiros da nova urbanización de Augas Mansas, que verte á xa saturada depuradora dos Verxeis, e que só se poderán solucionar coa construción dunha nova depuradora xeral para toda a zona da C-541.

### Recollida e tratamento dos RSU

- Mellorar de forma xeral o servizo de recollida do lixo, especialmente grave nalgunhas aldeas e nas novas urbanizacións. Actuará-se con especial urxencia nos casos máis graves, reiteradamente expostos polos veciños.



- Mellorar e publicitar a recollida selectiva de voluminosos (móbeis, electrodomésticos,...), poñendo en práctica medidas de control para evitar futuros vertedoiros. Criarán-se ademais ecopuntos nos que depositar pilas, pequenos electrodomésticos, pinturas e todo tipo de pequenos materiais reciclables ou potencialmente perigosos para o medio.
- Eliminación dos vertedoiros incontrolados e recuperación dos espazos.

### Abastecemento de Enerxía

- O BNG comprométese, dende o goberno municipal, a negociar con UNIÓN FENOSA e a Consellería de Industria a eliminación dos déficits do servizo de enerxía eléctrica, que aínda non garante en moitas aldeas unha potencia dentro dos límites estipulados nos contratos. Neste sentido, asesorará-se e axudará-se aos veciños afectados pola deficiencia nas súas reclamacións.



- Promoverán-se e negociarán-se proxectos coas empresas interesadas para garantir, progresivamente, o abastecemento de gas a todos os núcleos do concello. Esixirá-se o cumprimento das licencias de distribución concedidas, garantindo a extensión do servizo de gas a toda a urbanización dos Tilos.

### Outros servizos

- Revisar o número e circunstancias de urbanizacións non recepciónadas polo Concello, para estudar as posibles solucións aos problemas que plantexan: lixo, papeleiras, xardíns de uso público,..., e tomar as medidas necesarias respecto aos incumprimentos das promotoras que impiden a recepción destas obras.



- Esixirá-se da *Sociedad Estatal Correos Y Telégrafos Sociedad Anónima* o cumprimento da Lei 24/1998, que establece a recollida e o reparto *todos os días laborables e, como mínimo, cinco días á semana*. Requerirá-se o mantimento dunhas instalacións dignas no Concello de Teo, negociándose as necesidades de plantilla que posibiliten un incremento significativo nos horarios de atención ao público.
- Incrementar, protexer e coidar espazos de uso público que sirvan como lugares de convivencia e lecer (prazas, parques, xardíns, zonas peonís,...)
- Promover proxectos orientados a conseguir ampliar a oferta de telefonía e novas tecnoloxías no ámbito do concello e proceder de inmediato a iniciar a numeración de todas as vivendas e parcelas na zona rural.



### Meio ambiente

- Protexer e preservar os espazos naturais promovéndoo como un ben cultural de uso e desfrute público e fonte de desenvolvemento económico. Neste sentido, deseñarán-se roteiros naturais de carácter lúdico e educativo através das zonas de maior interese medioambiental.
- Velar polo cumprimento da lexislación e da normativa medioambiental, especialmente no caso de industrias molestas, asumindo e efectivizando todas as competencias municipais que a lei permite. Esixirá-se o cumprimento da lei e, polo tanto, a recuperación paisaxística das zonas explotadas, no caso das canteiras.

- Conservar e restaurar os cauces fluviais, prestando especial atención ás zonas de maior sensibilidade, como á da Burga; corrixir os efectos negativos dunha concentración parcelárea do monte mal deseñada, evitando así a destrución da masa forestal e dos espazos naturais autóctonos, e elaborar un regulamento para a plantación e conservación de masas forestais.



### Política lingüística

- Cumprimento total da lexislación vixente sobre o uso do galego como lingua oficial de Galiza polas entidades locais e normalización plena da documentación administrativa, dos servizos municipais, parque móbil, ruas, prazas, topónimos, edictos, bandos, anuncios, programas de festas, etc.
- Criación do servizo municipal de normalización lingüística, dotado de medios materiais e humanos, e dunha Comisión Municipal da lingua, onde participen os colectivos sociais interesados no deseño e aplicación da política lingüística destinada á poboación e aos diversos sectores

### Cultura

- Posta en marcha inmediata da Biblioteca Municipal da Ramallosa, nun local que reuna as debidas condicións, cun horario axeitado ás necesidades dos usuarios, e co persoal necesario para a súa posta en marcha e xestión. Con este fin, e co da creación do Arquivo Histórico Municipal, crearase unha praza de Técnico en Arquivos e Bibliotecas.

- Criar un Consello Municipal de Cultura e Patrimonio, no que estarán representadas as asociacións culturais e veciñais, e os artistas, técnicos ou criadores.
- Criación de centros polivalentes para o desenvolvemento da actividade cultural e social que poidan dispoñer, segundo as necesidades de cada zona, de sala de lectura e estudo, salón de actos, videoteca, fonoteca.... Este obxectivo conlevará a construción de novas infraestruturas, como no caso da zona dos Tilos-Montouto, ou a recuperación e rehabilitación de infraestruturas xa existentes noutros puntos do concello.
- Establecemento de convénios coas asociacións culturais ou deportivas que contén con patrimonio inmobiliario propio, para a restauración e reparación dos seus locais e que posibiliten un uso público e un aproveitamento social máximo. Do mesmo xeito, establecerán-se convénios cos centros públicos de ensino para a utilización das súas infraestruturas con fins culturais abertos ao conxunto da sociedade.



- Aprobar e poñer en funcionamento o *Regulamento para a concesión de axudas e subvencións municipais a entidades sen ánimo de lucro* que o grupo municipal do BNG elaborara e presentara ao Pleno nesta lexislatura, someténdoo á consideración das asociacións que desenvolven a súa actividade no concello. O obxectivo do Regulamento é definir criterios de reparto xustos e obxectivos, regular o procedemento de concesión e garantir a transparencia e legalidade en todo o proceso.

- Criación dunha praza de Técnico de actividades culturais, responsábel da dinamización e xestión da actividade cultural municipal e da súa coordinación coas actividades propias das asociacións culturais.



- Realizar o inventariado, catalogación e rexistro municipal dos bens móbiles, inmóbiles ou inmateriais de interese artístico, histórico, arquitectónico, arqueolóxico, etnográfico, científico, técnico ou de tradición oral do concello. Deseñar un plano de recuperación, protección e conservación do mesmo, e levar adiante un proxecto integral para o coñecemento, promoción e difusión do noso patrimonio.
- Criación dun Arquivo Histórico Municipal que conteña os fondos da actividade administrativa do concello, pasada e presente, e toda a documentación histórica de carácter local.

### Educación

- Garantir unha óptima conservación, mantimento e limpeza dos centros de Educación Infantil e Primaria. Velará-se, de forma prioritaria, polo cumprimento das normas de seguridade en todos os centros educativos do Concello e pola eliminación das barreiras arquitectónicas. Prestará-se especial atención ao coidado e mantimento do entorno dos centros (iluminación, limpeza, seguridade vial,...).



- Completar a rede de centros, de maneira que permita a oferta de ciclos formativos de grao medio e superior.
- Ampliar a oferta de centros públicos de primeiro ciclo de Educación Infantil (Garderies), de xeito que se poida atender a demanda existente. Neste sentido, cómpre modificar a xestión e espazos da garderia dos Tilos e esixir a posta en funcionamento inmediata da garderia de Calo con persoal e dotación a cargo da Consellería de Familia.
- Posta en marcha inmediata do Consello Escolar Municipal.



- En colaboración coas ANPAS e outras institucións, o Concello poñerá en funcionamento nos centros públicos do seu territorio un servizo de atención aos nenos e nenas en horario previo ao comezo das clases (con servizo de almorzo) e ao finalizar estas, co obxectivo de que os pais e nais podan compatibilizar o seu horario laboral co horario escolar dos nenos e nenas.

### Sanidade

- Ofertar terreos de titularidade municipal na área de Cacheiras que permitan establecer un convenio entre o Concello e a Xerencia de Atención Primaria para permitir a construción dun Centro Sanitario que palie o deficit, tanto de persoal coma de infraestructuras, que existe nesa zona.
- Garantir un servizo público de transporte que asegure a comunicación entre as distintas parroquias e os centros sanitarios existentes.

### Servizos sociais

O modelo organizativo dos servizos sociais de atención primaria municipal debe ser modernizado e achegado á cidadanía. Os servizos e programas que presta este departamento verán-se mellorados seguintes medidas:

- Traballo coordinado de todos os profesionais do eido social do concello, para conseguir actuar coerentemente sobre a realidade social.
- Desenvolvemento do traballo comunitario, para potenciar a organización da sociedade civil e construír vías de comunicación efectivas entre os servizos sociais e a poboación, así como o coñecemento da realidade social.
- Progresiva descentralización dos servizos sociais, achegando a atención aos cidadáns nas parroquias máis afastadas,
- Conseguir chegar a ter un/unha Traballador/a Social de Atención directa por cada 6000 cidadáns, para acadar así a meia estatal de poboación/profesionais.



### Mocidade

- Criar unha Concellería da Mocidade, dotada do orzamento suficiente para levar a cabo as actuacións e xestións necesarias dentro do seu ámbito de competencia.
- Constituír o Consello Local da Mocidade, no que terán cabida o Concello, asociacións xuvenís, organizacións políticas e sectores interesados. Centrará as súas actuacións no estudo, seguimento e avaliación das necesidades da mocidade e nas actuacións conducentes a súa satisfacción.

### Políticas específicas de atención ás mulleres

- Creación dunha Concellería da Muller, encargada de marcar as liñas de actuación neste campo e de que se executen todas aquelas medidas adoptadas.
- Elaboración dun Plano para a Igualdade de Oportunidades e de Trato para as Mulleres adaptado ás necesidades do concello.
- Especial atención á violencia de xénero, promovendo a difusión do servizo de información destinada a previr e deter a violencia doméstica e a discriminación feminina.
- Fomento da participación das mulleres na formación cultural e laboral para a súa incorporación aos eidos da vida social e laboral.



### Deporte

- Impulsar a instalación dunha piscina climatizada municipal que posibilite o aprendizaxe e a práctica da natación a todos os veciños e veciñas que o demanden, durante todo o ano.
- Diseñar un plano de desenvolvemento deportivo, dirixido á xuventude, que permita a práctica xeralizada dunha actividade deportiva e facilite e promocióne, dende a infancia, a práctica específica dalgún deporte. Do mesmo xeito, fomentará-se unha actividade deportiva de mantimento da poboación en xeral, con horarios e medios axeitados.
- Impulsará-se unha política de axudas, transparente, a partir de criterios e baremos que primen o modelo educativo e o traballo máis que os resultados.